

四庫全書

集部

欽定四庫全書

東里續集卷五十七

明 楊士奇 撰

詩七言古

瑞應玄兔詩 有序

宣德己酉春二月寧夏守臣進玄兔夏四月復進
臣謹考載籍所紀瑞物如赤兔白兔昔常有之而
玄色蓋鮮我太宗文皇帝臨御嘗一進闕下紀於
瑞牒皇帝陛下嗣臨大寶數月之間凡兩見之又

同出於一所此豈偶然哉兔在十二支屬卯於時
為春長育之方也寧夏在國之西於時為秋物成
之位也而亥實天之正色君德之應也欽惟陛下
宵衣旰食孜孜保民數下詔書飭勵百司崇寬厚
施賑貸已逋責省刑罰舉賢才黜賊吏無非以仁
民也今茲瑞兔蓋天以昭陛下養育斯民之志而
所出方位又以豫兆將來有秋之祥實陛下天德
仁民之應也猗與盛哉臣叨列朝班躬睹盛美謹

賦玄兔詩一首上進詩曰

昊天大德仁兆民簡畀明聖為民君陛下神聖兼武文
允膺景命體至仁統視海宇如一身剡剔匪類皇威振
整飭網紀百度新霈德覃化流沄沄靡有遠邇視平均
至和融凝天貺頻厥來煜煜鳳與麟嘉禾秀麥咸薦芬
異瑞比出西郊潰不牙不角跌而跋彷彿逸出中山羣
閒雅負異東郭魏匪緇匪緇色尚玄為雲為霧駢莫分
含章韜彩柔且馴嘗有異質素與繡懿此玄瑞世絕聞

吐養萬物東方神正秋之位收穫辰矧乾正色應至尊
稽德揆義良有因豐稔之祥茲豫陳西人得之愕且忻
居以雕籠承錦茵踰岐涉汴趨楓宸食之瓊芝飲醴泉
上林御苑游牲牲聖仁之應自天申詠歌洋溢懽縉紳
陛下大知察邇言祇天保民永弗諼四表一統熙和春
陛下洪福齊乾坤

瑞鵠詩 有序

西域古多名馬賽瑪爾堪又極西之地正統四年

六月初三日其酋長進良馬色玄額蹄皆白體質
瑰竒賜名瑞鵠洪惟聖人在位德化之敷遠被數
十萬里外故嘉應來臻臣民懽忻前所未睹有詔
畫史圖之謹賦詩歌詠之

西過流沙沙浩浩遠來良馬標瑞鵠鳳膺虬首耳竹披
目如夾鏡揚光輝天生瑞鵠毛質異一片玄雲被全體
高題中點雪光明四蹄皆白如瑤瓊有時長鳴欲奮迅
捲地蕭蕭朔風振軒昂卓犖真龍駒電邁雲馳見竒駿

聖人御天海宇清泰階六符明且平房星儲精產靈物
為祥為異來神京葱河崑崙夜飛度左右王良皆造父
羈金絡玉立彤墀思榮屢得重瞳顧自昔名馬稱驕驪
亦有紫燕兼飛黃當時萬馬皆莫及敢與瑞鶻爭騰驤
玉陛朝回仙仗下五色雲車未駮駕瀛洲草綠風日和
顧影長嘶意瀟灑國手含毫擬曹霸瑞鶻龍姿今見畫
聖皇圖治急才賢審象亦聞求在野大明當天萬物覩
會有夔龍帝時舉簫韶九奏神人和瑞鶻鳳麟同率舞

蔡舍人輓詩

時丁母憂卒於家

公昔騎驥登周行握瑜懷瑾鏘鳴璫凝神月朗髯戟張
溫如綠野熙春陽勁如檜栢凌秋霜後來藩府前經商
在卑不屈高不亢德厚祿微胡可量朔風一旦懷高堂
脫纓垂衰趨故鄉幡然升雲遊帝傍迢遙東海徒相望
望公憶公何時忘

奉送李丈人之宣城就養

若溪丈人過七十兩臉渥丹頭雪白平原不改昔衣冠

鄂渚殊憐舊鄉陌鄂渚西邊花樹陰更來闢館對青衿
四時有錢解沽酒幾度逢書盡賣金大兒清韻亦如此
去年高舉青雲裏錦袍白晳耀芳春畫幕紅蓮開綠水
奉檄由來志養親只今得祿待嚴君行霑鸚鵡洲前雨
去指敬亭山畔雲戎閩清時疎案牘從此承顏懼不足
東風低拂綺羅筵春光迴映斑斕服丈人宴樂誰與同
宣城山水嘉莫窮閱歷舊遊懷李白還賦新詩似謝公

題虎溪蕭氏卷子

連山飛來如虎蹲，溪水百折緣山根。縈迴陜曠忽異狀，
武陵未數桃花源。大宅誰家住深窈，粉壁紗窓動晴曉。
門前稻麥連紛紛，千畦萬畛翻青雲。雲深截斷樵牧路，
車馬城中那得聞。四時高堂會宗族，旨酒肥羔間山藪。
座中詩禮羅俊賢，楚楚威儀光佩服。此地移家今幾傳，
但聞朝代忘歲年。南階喬木昔人植，如今已上干青天。
從知遺安及孫子，豈獨地靈能致此。後來繼者更不忘，
更百千年胡可量。

送鄧存誠之襄陽

庾公南樓燕新乳
行子辭家春欲暮
西岸楊花白似銀
蕩日搖風滿江路
江邊漢水轉逶迤
南堂鶴髮正垂絲
願尋甘旨何愁遠
欲去臨分又復悲
子有清才出同輩
見者紛紛誰不愛
擅題繡句錦筵端
能畫青山白雲外
我來投分已三春
握手攄情共討論
即今相送緣鸚渚
明日相思間鹿門
鹿門芳草芊絲碧
尚有龐公昔時宅
池上山翁去不還
江皋神女無遺蹟
經過弔古易徘徊

且莫遲留定蚤來紅芳照映萊衣舞好及榴花五月開
馬孝子詩

孤墳四尺荒郊裏野草蒼烟帶寒水子孫有在在他州
生者無知知者死昔時未死語丁寧定將還葬附先塋
來尋墓隧失南北夢見言之真有靈上塚無人將百歲
啟壙猶存舊題記出離客土返鄉山父已申情子終事
由來至孝動皇天解髮繫鞍皆昔傳文章輝煌久不滅
知爾垂名俱萬年

送楊翁孝廉歸吳中

城中七月猶炎暑城下歸人趁行侶十年為客憶東吳
一日辭親發南楚楚江吳江路幾多揚颿處處盡經過
琵琶亭邊有明月長干門前聞踏歌千里蘇臺在行目
忽度楓橋到鄉曲顧瞻桑梓雜悲懽紛引親朋問寒燠
吳中歸日嘉可遊知君未得久淹留晚歲還為越鄉嘆
他州重有倚門愁

別劉宗誠

湖南十月新鴈飛白葦漸高黃橘稀蘭舟去遠復回首
唯見星沙連杳微前年作官臨海嶠海畔家家說司徵
一日啣哀返故丘三春忽盡不遲留遙趨北闕朝明主
暫下南樓謝舊遊此地賢郎獨為客把卷看雲幾朝夕
江邊迎喜拜親闈館下含情別師席臨岐牽手重依依
可憐恩義兩難違春來有使題芳札想為殷勤報鶴磯

題蕭德顯扇

石臺盤盤浸溪曲五月溪光帖寒玉千桃萬竹夾成雲

奕奕高門蔭深綠主人涼袂織絺裁越羅小扇揮炎埃
南薰院中聽寶瑟臨清樓上引金壘

朱澤民雲山障子為蕭德顯題

有澤民自題

昔聞朱侯寫山水一幅爭投百金價至順今來七十年
却在桃源看圖畫生絹八尺垂中堂羣山疊出開青蒼
前峯如屏錦霞爛後嶺宕堯挿天半春風啼鳥渾欲聞
石磴盤盤屢迴轉雙松如龍千尺強幾年偃蹇山之陽
松根古道向何處策馬擔簷去無數別看丹翠出層樓

雲影濃遮入無路雲遮霧渝深復深信有隱者藏中林
高懷遠致不可即空望微茫勞我心當時此景知何地
鴈蕩蘭亭豈相似自是天機妙入神位置從容見精意
朱侯朱侯追鄭老筆勢詞華共妍好此圖三絕交輝煌
千載人間視為寶

送李昌祺

盛年讀書擢科第共睹詞華艷雲綺翰林高步逐英賢
東閣潛心效文史身違定省五六年夢繞庭闈二千里

昨夜攄情達丹宸特許歸寧承玉旨謝恩初辭鳳闕前
買船遽向龍江涘江天未明早潮上汎復連朝北風駛
二月初旬應到家冠帶升堂親為喜囊中盡倒官俸錢
郡市西頭致滫瀡叙言契濶洽朋知趨走牽携懼稚子
愛親敬君事所重況乃皇恩厚無比還應回首顧王程
螺渚行艫須早理

送彭仲宜歸荊州

時禁釀

四月都城風日好遠客違家思芳草秦淮河畔問南船

重譯樓前出長道，道傍送者皆縉紳。
玉堂編修情獨親，此來相看輕千里。
此會相懽能幾晨，晨發無由執杯酒。
折贈空持白門柳，臨分繾綣復申言。
已去蒼茫尚回首，蘆筍紛紛接浦橋。
鮒魚隊隊逐蘭橈，吹笛晚邀池口月。
揚帆晴帶海門潮，歸到繡林應夏五。
鷓鴣啼歇榴花吐，家慶趨承白髮懽。
雲光迴粲斑衣舞，還攜雙鯉放江湄。
江水朝宗日夜馳，都將鄉邑平安報。
稍解京華契濶思，題小畫贈曾貫還西昌兼致勉勵之意。

夫容綠水光鮮妍芳春秀質何娟娟六年虎觀馳彩筆
十月鷗江回畫船醉寫銀鉞送將別秋菊垂花紛可擷
請看石上青琅玕早晚凌雲挺高節

題楊學士藏陳所翁四龍圖

近代畫龍誰第一舉世所重閩陳容祕府人家屢曾見
葉公雖古難獨工此圖四龍妙無敵變化奇態纔數尺
乾坤黯黯闕雲霧風雷奔驅裂崖石騰身並出青冥上
盤拏天矯皆相向神光睽矐如劔鋸倒捲江潮起銀浪

陳翁畫意與誰同
愛龍所重澤物功
炎飈六月撼原野
矯首滂沱如畫中

題蘭石寄王善學

清源先生鄉達尊
昔以通家拜函丈
別來四十有三年
至今儀形勞夢想
當時令子樸且真
與我相懼亦長往
有孫今傳祖父業
投徒假館雙江上
不隨塵俗混驅馳
但以詩書待諮訪
潛心篆籀積歲年
徃徃揮毫作題榜
我雖聞之未識面
已為名家動歆賞
玉堂侍讀重同宗

萬里睽違心怏怏此圖寄贈有微意我為題詩叙疇曩
清貞比德蘭與石珍重幽人在林莽

題開封黃璿太守感螺卷

叙州黃氏有孝孫冬月大母病熱煩渴心苦思螺療疾
田枯溪澁那可得孝孫求螺急倉皇手足凍皴膚肉僵
是時孝孫年一紀至誠感神神祐只探穴得螺四十多
煮液一進蠲沉痾姜詩王祥古孝子孫之孝感見黃氏
黃氏子孫賢且貴作詩為告觀風使

題畫贈陳本深太守考績復任

吉州太守明州彥三十朝紳贊邦憲詩書法律重老成
冰雪操持萬人見先帝孜孜念幽側廷中親選二千石
天語丁寧寄撫綏五采龍章光烜赫螺岡鷺州開郡府
九邑嫖嫠需召父陳侯下車興隱惻育鵝濡枯作甘雨
豺狼遁迹犬息吠胥史無姦獄無滯桑麻藹藹連郊坰
絃誦洋洋起闐闐大江之西十三郡陳侯特達騰聲聞
驂騑寧久雙轂淹鵬鷲須當九霄奮我昔京華接隣屋

幸甚鄉邦得賢牧，入奏重聞功績最。
勞問還嗟別離速，冰霜嚴凝歲華暮。
五馬雙旌復南去，蒼筤樹石貞澹意。
特贈邦侯表清素。

題湯都司東臯草堂

君侯襟度清於玉，草堂長憶東臯曲。
堂中高韻列詩書，堂下幽香繞蘭菊。
雄藩此日任干城，玉帳牙旗常夙興。
我家亦有東臯屋，春雨蒲田歸未能。

題定知州瞻彼南山圖詩

北方之山恒山尊上出河漢凌星辰常時出雲作霖雨
滋育萬物乘陽春東風浩蕩清川瀉川上人家住瀟灑
內黃舊是故殷城臨水觀山足公暇此邦名與山齊高
古來為政多賢勞高山景仰攀逸駕母負青年志氣豪

蕭啟御史赴山東僉憲以何澄所畫雲山求題

宜陽太守多公暇肆筆雲山出瀟灑層峯疊翠凌蒼空
英英玉氣浮鴻濛縹緲瀾漫渾無跡妙逼房山高克恭
山乎雲乎定何處誰結茅屋倚深樹豈無獨抱千載心

玩水看山適朝暮栢臺御史撫此圖憶得龍泉江上住
岫幌巖扉意不忘十載京華未歸去秖今驄馬復東行
馬上看山向齊魯君不見秦岱之雲起膚寸常向人間
作霖雨

題衛以嘉藏盛子昭畫

盛生家住吳山下前代風流多見畫此圖三尺更清竒
野水疎林澹瀟洒風平雲淨霽景鮮玻瓈倒映水中天
鑑湖洞庭不可辨隔浦山光落釣船蕩舟者誰定曾識

渺渺相望似相覓尋常一曲滄浪歌醉倚汀沙白鷗側
鷓鴣夷羊裘世久無浮世虛名安足沽放懷縱意任所適
何處烟波無釣徒

題崔氏重慶堂

昌黎縣中山水清自昔挺特生賢英上究羲農至周孔
攘闢老佛大道明我敬其人想其處身縻祿仕無由去
崔生近日起昌黎邂逅相逢談所慕生昔泮水來游歌
明經三十登賢科鍊冠霜簡入烏府歲久政譽傳流多

天官奏績天顏悅五采祥雲騰鳳勅堂上雙親共拜恩
更有重闈歲將百重慶堂中春晝長壽酒日進青瑤觴
四親三百又餘歲白髮蒼顏皆樂康家慶融融由世德
蘭玉森森蔭松栢剝取詩書遺後來豈無繼續昌黎伯

送欒瑄太守復任大同

東萊欒卿粹如玉皦皦操持恭且肅秋官郎署居十年
盛有聲名京國傳九重聖人御明堂簡擢賢俊安邊方
欒卿出拜二千石郡中如得龔與黃下車正屬民凋瘵

起仆濡焦不知怠帥閫崇嚴兵戍殷徵需瑣瑣無昏晨
鞠躬勤事靡缺失上下不間稱其人三年報政朝天闕
奏最重臨促明發丈夫有志遇明時寶劍精光肯沉沒
霜風十月紅樹凋五花征馬鳴蕭蕭自古公卿出賢守
黃鵠終當凌九霄

題康榦竹石

康甥孟貞純且質家住珠林小江側兄也霜臺我鷹冠
貞也躬田食其力好山好水當衡門遠遠城市無囂喧

身閒力學嗣爾祖不見他家賢子孫有心如石不可轉
蒼筤有日干霄漢邂逅為爾題畫圖七十老翁言匪迂

題竹與余存忠驛丞

家住芝山番水上官作楊村驛亭長金門使者五色書
擊鼓亭前開畫舫竭來敬我同江鄉我亦報之雙篋當
成陰結實須有日會下崑丘青鳳凰

新橋驛阻大風

南風吹河吼怒濤河上飛沙千仞高臨流十步不得濟

北瞻閭闔心煩勞自春不雨田無麥穀田焦枯亦龜坼
密雲四合掃復開誰叩天閭訟風伯農家束手徒嗟吟
愛民自是天之心願收巽二勅屏翳普千萬里均甘霖

黃氏壽諼堂詩

有序

石城黃友玉清雅君子也其弟新會簿友菊嘗從
余授經兄弟皆於余厚別五十有五年今友玉之
子中來見蓋父叔皆久謝世余為悵悵久之中獨
幸其母之壽康也今授訓導赴延平求作其家壽

諼堂詩蓋余於黃氏不能無故舊之感云

琴江黃氏好兄弟五十年前屢過之今來都門遇令子
卓志能承書與詩二老風流已長往獨侍慈顏在堂上
鶴髮蕭蕭壽且康甘旨晨昏足豐養堂下忘憂多樹諼
晴日暄風花正繁斑衣婉愉獻春酒慈竹娟娟森子孫
除官分教延平去便道升堂榮拜母人生得祿貴及親
板輿還奉官中住將行索我諼堂詩為子喜色生兩眉
子家二老吾所重詩罷能忘故舊思

送周敬常詩

有序

白鶴觀吾鄉清真境也吾不到者四十年去年歸
嘗過之昔之道德老成皆已化去所知識惟用拙
鍊師在然亦老矣相懽未竟遽別今年其徒周敬
常來北京一再見之將歸乞詩遂為賦此且致意
其師云

去年奉勅還江南東風千里迎歸驂西昌城西訪真境
正值碧桃三月三檐檐威儀森鶴氅却憶仙翁隔蓬閣

霜鬢醜顏戴鍊師白玉觴行紫霞釀
喬雲垂彩拂簷端
芝草琅玕繞畫欄
懽言未竟登車去
天涯長憶三珠樹
戴師弟子來日邊
清顏皎皎夫容鮮
問師經年安健好
閉戶日詠黃庭篇
我有高懷在江海
為報而師掃氛靄
黃茅岡畔會重尋
白鶴峯頭定相待

送金少卿祭掃南歸

去年奉勅我還鄉
今年奉勅卿還鄉
我違鄉國四十載
卿違鄉國三十霜
仕者還鄉總朝

卿逢故舊當盡情明年春風朝北京

題金亮伯梅花

雪崖先生好孫子森森庭前玉樹枝
栢臺御史冰霜筆寫贈梅花真似之
朔風十月江南道萬里鄉園到應早
手持書卷傍花陰更厲平生歲寒操

題范啟東所藏俞漢遠雲山圖

會稽俞生富天趣筆法傳得高房山
白雲滉漾生空谷危峯飛出青冥間
灌木青葱俯谿曲溪面沉沉湛寒玉

超然肥遯者誰子深結茅齋擅幽獨人間嘉景何處無
何必遠求衡與廬白頭塵累苦羈絆我念林栖增鬱紆
吁嗟俞生此遺跡俞范昔年交莫逆知是看圖重故人
不但溪光與山色

題嚴御史恭梅邊讀易圖

嚴新陞貴州叅政戴文進寫其舊學之所為
梅邊讀易圖贈之嚴君以求余題為賦長句
于顛
云

錢塘湖畔山無數湖上古梅千萬樹之人結屋傍湖山

坐起常在梅花間微風吹林動香雪水色山光總清絕
手持一卷太古編周孔所示皆微言推辭通意必造玄
二儀分判自太極尋源更沂庖犧前潛心虛懷知幾年
時來不得安考槃繡衣白簡我薦冠風采六月冰霜寒
辰陽西上開省署又捧除書向西去天香滿袖出金鑾
帶作邊方九春雨邊塵不動邊人安展圖還憶錢塘看
從知玩易有真趣燕寢凝香清晝閒

贈伯時外弟

海榴作花梅雨息令弟五月來京國玉堂晚歸初見之
豁然令我舒胃臆傳杯剪燭兩遲遲還因親愛動懽悲
清姿秀質今在眼嚴父慈親空永思又促明朝理歸舫
家在西城柳溪上高樓深館絕塵紛努力詩書振餘響

贈紀指揮畫卷

曲欄梧桐花正吐萬玉蕭蕭寫青雨珊瑚紅樹拂天風
六月人間不知暑琵琶收絃寂無語夢裏隨雲度銀渚
侍者如花握金縷倚繡娉婷對容與意遠神清皆僕僕

人間閒樂等神仙更詫蓬山在何許

題費同知松樹障子

當代畫松誰最精王紱卓迪俱馳聲兩生以來鮮繼者
鳳池周璿新得名此圖筆有千鈞力全幅剡藤開潑墨
雙株奮起如雙虬直氣森森勢千尺樛枝屈鐵蟠穹蒼
勁節磔磔鱗甲張長風颯颯動滿座六月清晝高堂涼
吉安別駕好奇古對此宛然巖壑趣伏苓琥珀焉足期
堅操終懷共遲暮別駕別駕臨安彥浙東山東宦遊徧

四明徂徠千歲植所歷山林屢嘗見大材之成由化工
自古匠輪希得逢明堂清廟選梁柱何限空老深山中

小山書屋

有序

鳳岐侍讀得賜歸求作小山書屋詩為賦七言古
體一首且寓別意云

文江之東小山麓舊有高人讀書屋繞屋森森松作林
松陰行吟松下讀平生讀徹書五車鹿鳴宴餞來京華
御前奏對三千字五彩椽筆登鑿坡蘭臺石渠富纂述

獻賦陳詩誦功德日給珍羞飽大官宮錦無時出褒錫
黑髮去鄉今二毛近侍光華更四朝人生倦勤思暫逸
小山南望心搖搖鵬搏九萬六月息丹桂花香別京國
舊屋還歸小山下鄴侯多書仍滿架門前冠蓋來紛紛
少日同學何人存青松拂雲盡成蓋慈竹青青蕃子孫
隣叟時過話耕稼亦有說說執經者紅牋錦軸金繡段
更覺文章動高價老夫垂白念鄉闕早晚天恩應賜閒
長風萬里泝玉峽艤棹文江訪小山

題蔣主善梅

蔣氏傳家秉清白住在金陵大江側
三徑風流松菊存別有梅花春意繁
開軒正對花林下襟抱冲和興瀟灑
香浮丹鼎雪融初影轉琴牀月明夜
自承徵詔戴朝冠朝朝拜謁趨金鑿
故鄉迢遙隔煙水十年夢遶梅花寒
閒暇從容詠清句節操從知凜貞素
嗟余同是愛梅人何時歸賞江南春

長短句

題丘氏平原十景圖

昔年過東昌遊平原望玉山萬松夾逕鳴珊珊翠屏疊
出青冥閒石礮瀑布飛秋雨彷彿龍吟井江暮東陂流
泉清我心盡日徘徊不能去仙人夜半西極來闕雲燦

爛紅蓮開邀我闕

萬壽之宮裏酌以沆瀣青瑤杯隆

山鳴鍾促天曙懼言未竟東西去扁舟來往不復尋江
中遙望空雲岑湖塘月色今何似歲晏黃原飛雪深之
子幽居有清賞展卷那堪動遐想到家還過仰山祠刻

我題詩青石上

題康氏臨清樓 有序

家兄贅康氏時余甫十數歲屢往來其家及其子
姪遊嬉蓋今四十餘年矣而足跡不一至文溪者
又二十年頗聞高門大第加舊觀多矣思裕來京
持臨清樓卷求詩故走筆賦此且致期望之意云
文溪似秋浦窈窕湛寒玉天淨波平一鑑開倒影金華
千仞綠人家多住溪東西飛棟輝煌接華屋踈槐楊柳

蔭當門翠荇紅蕖悅心目康氏樓居更蕭爽雕欄百尺
凌雲上仙姥峯高望欲齊狀元洲近平如掌詞翁酒客
屢招尋吹竹彈絲共懽賞風物清華入吟嘯闐闐喧囂
斷輪鞅憶昔總角初常遊溪之涯拆竿坐石堪垂釣臨
水提筐逢浣紗朅來忽復四十載漂泊不歸雙鬢華天
涯徃徃聞逸興邂逅題詩徒自嗟豈不聞宋朝曾孝子
三子科名相繼起連篇文采動公卿文溪之名自茲始
今人何必非古人珍重貽謀在經史他年若綰銀黃來

仰視高樓耀閭里

題揚學士藏子昂畫刺虎圖

婦牽車夫推轂車中兒貌如玉全家遠戍不辭苦日暮
途荒車下宿山淒淒林謾謾颯然陰飈度夫身罹虎毒
婦奮遂虎曳虎足呼兒抽刀斫虎腹倒虎肝腸夫來復
終然婦憤不可平夫命無由百身贖有司甄函上行義
華表輝煌旌白屋千年異事太史錄人生富貴焉過目
誰有姓名光汗竹吳興妙絕詩與畫況復巴西詳委曲

昔賢汲汲翼名教競為表彰勵民俗建安學士古人心
珍襲此圖常韞匱偶然出示慨古道援筆題詩愧貂續

題畫送歐陽廣哲

往昔送子時春冰洞地明兩京遂間闊相望搥心旌今
年子重來幾日復南征念子道路難激我離別情是時
碧梧亭亭汎露彩翠竹瑟瑟含秋聲躊躇何以贈遠行
子負挺特姿瀟灑梧竹清豈不聞嶧陽之產中琴瑟嶮
谷之材諧律呂人生有志當大用況遇明時事堯禹常

保堅貞德不隨流俗遷不見溪頭磐石重如山時解出
雲騰九天

陳氏貞壽堂

北堂融融春晝長錦樹錯落含春香堂中老母今八十
鶴髮如絲身樂康母昔初嫁時玉環自矜惜殷勤奉君
子顧盼憐貞白一從守空閨皎皎冰雪色下有男兒
力學慕古人季兒生來不識父今年六十霜鬢新明經
射策選上第金馬玉堂高致身大箱俸錢奉慈母願母

十年百年壽清朝南極老人星正照華筵酌春酒五
福重好德德厚福亦同偉哉貞壽堂鄉里高其風人之
貞節乃大義烟如白日光洞地方今聖朝務表勵作歌
欲告觀風使

題瑠林積雪圖送張宇初真人歸龍虎山

北風十日雪大地氣嚴凝江湖千里斷行跡溫泉火井
皆為冰盤盤龍虎山岩堯出塵表勢並匡廬近斗牛疊
巘重崖隔深窅向來積雪紛不消千樹萬樹凝瓊瑤素

鸞鶴下飛舞空中縹緲天香飄上清真人質清絕吐
氣如虹貌如雪袖有三華寶篆文腰佩千年蒼水珠常
招赤松為雨師曾遊東海邀安期手執玄樞斡元化一
掃氛翳回春熙玉皇端拱通明殿紫鳳雲章頻召見天
京十二樓五城親接羣仙奉華宴五彩春霞導金節還
向山中燕飛雪明年北上翔雙鳧更采靈芝謁丹闕

贈族孫褒

褒應教官舉以後期免歸來辭
出此贈之且示詩以廣其意云

萬里江南來還歸江南去丈夫得名何必早大器之成
在遲暮豈不見深山長谷松栢林閱歷風霜年歲深明
堂清廟選梁柱匠石奔走來相尋我家住西昌於今四
百載詩書門庭冰玉操炯炯光華著先代人生出處自
有時立心但與前人期還家力學謝塵俗六翮排雲應
未遲

題竹石送陳有戒重使闕西

驄馬碧玉蹄飾之黃金勒振鬣嘶青雲汗溝流赤色烏

臺使君鷹作冠繡衣虬髯冰雪顏
大庭親授五色詔西出綏撫踰秦關
長安城中旌節駐富有懽謔動衢路豺
狼遁跡犬生羆不斷和風送甘澍
安內攘外職當為秋高九月行邊陲
綏延寧夏瀕絕漠城高兵堅馬盡肥
歸朝奏章累十紙仰契天心天為喜
為臣體國寧顧家璽書重下歌皇華
縉紳祖送都門道雪後飛埃淨於掃
丈夫事業在盛年莫遣麒麟畫衰老
不見渭川竹可以栽汗青不見華峯
石可以鑄姓名功名到手不可讓相期

千載傳芳聲

題竹送歐陽哲僉憲之汴

豈不見奉大祭薦用璧與琮豈不見作廣厦選裁梁與
柱國家致理仗才賢教養成之在黌序聖皇宵衣急文
治大廷勅舉觀風使玉璽盤龍五色書親遣巡行嚴教
事六一宗家有遠孫清才素行如璵璠手提文印之官
去馬頭南望河南路河洛天地中崧高峻極天降生周
家申與甫近代亦有文富賢兩程夫子明鄒魯道統上

承千載傳山川佳氣朝朝有靈秀鍾人物何曾間前後
子行所歷善教施本末兼舉真良師後來功業有奮起
看子譽名同遠垂臨岐何以贈別離清風瀟灑丹鳳枝
天寒歲晏凜冰操持用慰我遙相思

題張氏秋月軒

其人能相

開軒對秋月皎若白玉盤光輝上下澈無際洞然八極
天地寬山河微茫影可識拂雲桂樹常團團太虛無塵
萬籟淨玉繩璀璨金波寒是時秋氣澄俯仰皆奇觀靈

臺湛湛俗不染坐與月色相盤桓念昔少小家西陲愛
此明月同襟期黔南薊北行欲老惟有明月長相隨月
輪萬古行乾坤年年常閱秋與春平生雙眼炯如月閱
人富貴兼賤貧誰其胷中如月明煩卿一閱世上人

惜別行送朱存禮致仕歸鄱陽

御柳含春綠初徧紫燕黃鸝滿芳甸曉日承恩拜九重
銀鞍白馬驕嘶風我出送之城之東惜別且駐無匆匆
憶昔携書漢江溪邂逅論心託交義折梅載酒春共遊

燒燭聯詩夜無寐卿才卓犖不可羈雄詞健筆皆如飛
積金堆玉豈暇顧登山臨水常忘歸南飛雲鵠北飛鴈
渺渺天涯兩分散即今三十餘六年前日紅顏皆白顛
五嶺炎方桂林好忠輔賢王己身老功成名遂天所全
七十歸來世看寶嗟余擣散質

闕

清未有涓塵

效禪益虛叨寵祿孤聖明望卿去兮慚感并傾離尊餞
遠道重是平生故何由盡懷抱官河三月波溶溶片片
飛落桃花紅九華匡廬翠未了芝山秀出鄱湖東武山

南在芝山上解紱他年定相訪

贈眼醫張生張侍郎求贈

人身具兩目精氣咸注之偶然神光困邪沴雖有四體
將焉為丹砂空青療盲晦異效徃徃聞良醫今之羣陶
少司寇治刑求生劬以疲況復嬰憂目為眚邂逅拙工
乖所施雙目等河注愁坐俛兩眉園扉紛紛叩蒼昊瘡
我公者龍樹誰河南張生亦超越曾藏竒能口不伐小
施寸七捷於神盡掃浮雲見明月

題竹送羅文衡湖廣憲使

駸馬青玉蹄銀鞍碧絲韁振鬣忽長鳴矯矯飛騰驥朝
發都畿暮荆襄千里歎忽流電光繡衣騎馬上郎顏
如玉潔髯雲張十年北面侍明主鐵冠白簡橫秋霜九
重惠南土輟此殿陞良命之特斧振憲綱澄清洞庭及
湘漢盡洗陰翳開春陽青霄白日上鵬鷄及時功業須
奮揚我有絕俗意贈之翠篔簹貞姿不柔亦不剛中虛
外直操有常隆冬冰雪凜嚴厲長與庭栢同蒼蒼交映

黃鵠山下之高堂清風永晝含琅玕坐使民物咸阜康

蒼龍歌

有序

蒼龍者天廡良馬也產于西域皇上臨御之五年
賽瑪爾堪之所貢也風鬃霧鬣蒼然若雲體質潔
素駿爽特異按傳記所載馬八尺曰龍此蓋龍云
昔成周時越裳氏重譯獻白雉以為中國有聖人
也今遠人貢馬豈非同此心乎不然何以其一且
涉十數萬里而來獻也畫史既圖之臣謹作歌以

紀其事云

天馬生西域神駿挺卓特雙目如鏡懸方瞳紫焰紅光
烟相射長身昂長八尺龍腰裹飛黃竒骨同青絲滿梢
尾窳地滄滄霧鬣連風鬃四足高蹄削踏鐵滿身猶被
天山雪逸氣超遙時一鳴但覺颯爽長風生從知天駟
宵降精晶熒下澈寒泓澄靈物翕合嘉祥興戎夷得之
紛駭目顧嘆荒遐安得畜中華聖人今帝堯錦韉玉勒
東來朝芒芒沙磧渺渺西極蕭雲奔電千里一息登瑤

京上赤墀下邦小臣陳奏詞年來泰和洽邊陲乾坤靈
瑞世罕見端自皇仁所致之公卿拜舞效嵩祝陛下萬
壽日月齊周文德盛駘驄至漢武役志勞貳師朝廷服
遠在有道聖化真與周同規畫史揮毫紀盛事敬作歌
頌垂耀無窮期

晏太守重慶堂詩

家居重慶郡堂奉重慶懽堂中二親大母母白髮如銀
身健康大母行年九十三母也今年七十五姑慈婦孝

天錫壽旨酒在樽
殺在俎踰躩五綵服
遠膝戲孫曾森森
暖翠慈竹茂爛爛
雲錦設草榮象簡
緋袍日趨拜門擁
彤幡燕皂蓋邦侯
為政儼龔黃能致
高年總心快故家
元住大江西元獻
聲華北斗齊公侯
子孫必復始封誥
行看照閭里

送彭勗御史南還

駢馬鐵連錢錦鞍
珊瑚鞭東風都門
道旦發何翩翩霜
臺御史賢且文治
平中丞之遠孫賢
孫白日上鵬鴉東

廣南閩持教鐸九重召還賜廌冠勅付條章振文學南
畿一百二十二郡縣俊秀如林玉瑀琢世重賢才比麟
鳳杞梓梗楠作梁棟聖人垂拱坐明堂昕夕需賢升顯
用臣子受命當驅馳必有勲績裨清時山川何地無奇
產要知成器須良師蘇湖安定不易得蕭艾芳蘭豈無
擇與君同鄉郡分手重離情丈夫得志貴行道當令海
內揚鴻名

樂府

龍馬樂歌 有序

宣德九年八月西北守臣遣使獻龍馬其耳額及
頷及鬣尾皆肖龍而全體潔白如雪鬣毛層疊狀
若波文蓋騰驤卓犖有箭雲追電之意氣聞諸獻
者云其收之地有池下有龍馬常有雲雨晦冥風
雷交作於上蓋龍馬云勅賜羣臣觀之羣臣明日
請上表賀聖德謙抑卻而弗受臣聞上古聖神在
位龍馬出焉至漢元狩間馬生渥洼水中當時作

為天馬之歌協諸律呂用諸郊廟載在簡冊傳于
無窮今獻自西北西北乾位也固天馬所自出而
龍乾象也故又為龍馬瑞牒云龍馬仁馬也應德
而至又云龍馬太平之應也誠由皇上仁恩義澤
敷洽天下是以天降靈瑞以彰皇上大德以兆太
平之慶宜有詠歌協諸樂府以言揚鴻烈於悠久
臣士奇不材蕪陋謹行撰龍馬樂歌九章繕寫上
進其辭曰

多
ノ
二
卷五十七
龍馬出自西極應天駟躍方澤具龍儀暎玉色疑山立
備純德

右一

龍馬出神駿發鏡夾瞳玉噴沫追迅風凝皓雪靈瑞臻
耀天闕

右二

龍馬出掩驥羣捷流電籥商雲入玉闕登金門靈自天
瑞聖君

右三

龍馬出象應乾旦歷秦哺憇燕秣珠粟飲瓊泉偕祥麟
徵太平

右四

聖人作萬物覩神之駿出西夏日千里汗流赭宜乘御
揚神武

右五

身矯矯首昂昂虬之躍龍之驤邁茲白越飛黃協乾符

表文明

右六

乾之方星之精萃厥靈挺異生維聖仁來嘉禎維聖仁
壽萬齡

右七

龍馬出應皇德皇聖仁覆萬國天祐聖貞符錫聖子孫
千萬億

右八

龍馬出昭聖世光八表和四裔奉宗社格天地隆家邦
永文治

右九

七夕吟寄夏四秀才

迢迢天漢流粲粲織女明牽牛出其東何不長合并伊
昔承嘉遇懽言盡平生宴樂未及終回駕趣修程斯須
忽不見安得伸中情別長會日促睽違歲復盈終日秉
機杼七襄不能成思欲展嬋婉誰樂各斃斃同心而離

居嘆息涕淚零

題古木竹石

珊瑚出水天漠漠翡翠橫波月將落
隔林罷歌湘浦詞
片雲還向君山歸

商婦詞

販茶近在青山側販珠遠求滄海濤
全家衣食需多少
渺渺鯨波愁妾心

征婦詞

他家蕩子滯吳門
妾家夫壻成皋蘭
共是閨中別離泪
妾愁辛苦又愁寒

短歌行

青天高高行白日
忽西傾兮又東出
人生百年能幾時
身計未成早已衰
子孫成行各長大
手種蒼松盡成蓋
來日苦短去日長
何不飲酒居華堂
流光催人急復急
八十龍鍾悔無及


銅雀妓

高臺凝望處西陵落照邊
晝日自歌舞秋風咽管絃
息隨漳水遠恨與鄴雲連
惟有昏鴉集時時近墓田

隔谷歌

嚴風凋角弓鉦鼓鳴不止
弟兄但隔谷咫尺異生死
丈夫報國甘苦辛此時顧恩寧
顧身詎知兄弟左右手
臨難方為行路人升高聊一望
力盡心未已仰天呼弟兄
不來壯髮衝冠直如指
生為同氣親死作異鄉塵
自矜雄豪重仁義誰保艱難
不相棄豈不見南山桂樹同根

生百年雨露同枯榮又不見桓山之鳥同巢哺欲去回
翔不能征人生有情乃若此天地慘寂終難平嗚呼實
客滿堂歌伐木且請停杯歌隔谷



東里續集卷五十七

欽定四庫全書

集部

東里續集卷五十八

詳校官檢討臣羅國俊

中書臣

劉源溥覆勘

總校官進士臣楊懋珩

校對官中書臣范鏊

謄錄舉人臣呂日永

欽定四庫全書

東里續集卷五十八

明 楊士奇 撰

詩 五言律

伯陽新闢斗室有詩見示用韻奉和 二首

新來居斗室還自惜分陰盡日唯探易閒時不罷琴簷
昏鐘響度牕皎月華侵及此宜無事猶含白雪吟

閒居植蘭芷繞屋似沅江香露浮侵席光風動滿牕調
琴元少並摘賦更無雙來此皆心醉何須倒玉缸

湘陰縣

湖上湘陰縣清幽俗不殊江連三里郭市有數廛車地
產為陶器生涯寄網魚家家養黃犢誰肯負王租

送劉季友游錢唐

風送浙江船東游屬妙年湖山圍錦繡樓閣艷神仙柳
暗蘇堤曲湖平伍廟前此邦耆舊在還去問先賢

題劉氏交友卷

谷鳥嚶嚶興餘伐木情當時論友道何處託心盟杯

酒身相許千金意自輕還聞江海上今世有劉生

鍾長史木訥齋

賢王重師教長史足官榮清絕齋居裏新題木訥名近
仁由德性好古見儀刑一世誇輕捷君當表後生

示弼姪

有客傳吾姪攻書過昔時謙和自德性俯仰備容儀觀
水求溟渤登車慎路歧從茲萬里去努力在操持

寄仲亨兄

常記分携處維舟鷗閣磯親交情不淺遲暮苦相違白
髮花前徑青編竹下扉東城同輩少料得往還稀

永豐陳處士挽詩

世出潁川系鄉鄰六一居聲名崇孝友術業富詩書祿
養承昭代神游渺太虛兵曹懷永痛血涕滿衣裾

樂平屈氏母挽詩

其孫為給事中

夙有閨闈德兼聞母道賢教孫成令器享祿及高年
草凋堂砌松枝藹墓阡文章堪不朽表石見新鐫

送鄧宗經 有序

宗經負有用之才踟躕縣教三十年今其年未及謝事而引疾以去方是時上注意遺逸出所賦招隱之詩賜在廷重臣遂及諸司之長蓋庶幾幽遠之賢有聞之而起者而宗經決去宗經於余有舊辱過別故作詩送之宣德七年六月二十五日也久別時相憶重來又解携帝方求隱逸子竟返幽栖海樹連吳地雲山入剡溪草堂何處在莫遣世人迷

送王孟堅脩撰南歸 二首

東壁圖書府清華映上台朝廷重文治近侍總英才獨
罷金門直遙辭玉署回平生王逸少臨別恨難裁

從來歡聚意不似別情深愛子清如玉論交已斷金雲
霄開逸翮山水稱閒心浩蕩乾坤大相思何處尋

送雷誠智延平知府 二首

五馬引雙旌青春發帝京分符為郡遠衣錦過鄉榮祠
廟先賢近絃歌舊俗清祗應勞撫字莫遣愧陽城

平日豐城舊新年感慨多

時聞史郎中曹脩撰之訃

於君來往熟奈

此別離何柳色迷官驛鶯聲傍御河旗亭芳酒散不忍
對驪歌

過滁州馬上口號寄陳廷器

一入滁陽郡桑陰翳廣原紛紛納禾稼渺渺散雞豚清
夜無鳴柝長途不閉門皆云賢守化深荷聖朝恩

江浦縣遇曾于臯

淘金故人

忽遇髻年舊惟看語笑真清詩仍滿袖華髮已盈巾桑

梓二千里萍蓬四十春金溪吟嘯地因話共傷神

送周存誠州判致仕歸清江

二首

祕館連西掖編摩集衆英有才皆薦達垂老足恩榮曠
野心情熟浮雲去就輕明朝對玉笥山水有餘清

往歲同趨召茲晨獨送歸夕陽南浦棹春雨北山薇魚
鳥欣相得衣冠爛有輝無才纓絆繫徒此惜相違

送萬伴讀

初日照明光春風合殿香忽看辭聖上遠去從賢王畫

揖移江浦青山向洛陽經遊多雅詠相寄莫相忘

愉老堂

此翁衡嶽下白髮烟秋霜八袞過三歲諸孫藹一堂不
辭愉老日還注濟生方玉屑能扶壽朝朝進滿觴

蕭處士挽詩

識達前人重詩書後學師艱危存大義衰老見明時溪
舫秋雲冷泉臺月夜悲惟餘名姓在光映史臣詞

朝房待命

蒙恩宥後六部都察院大理寺通政司十二道監察御史交章列奏余罪不宜獨宥遂被

收於朝
房俟命

正是臨危處深知負罪頻
廷臣皆執法天子尚垂仁
紫殿紅雲近金河瑞彩新
恩波今浩蕩終憶借枯鱗

孔經歷挽詩二首

禮樂唐堯日詩書孔氏門
登朝榮象笏列署切薇垣
卓犖懷千載淒涼遽九原
英靈知不化未報聖明恩

識爾趨庭際芳年玉樹高
謙和自天性文雅出時髦
舊

好過從斷深情夢寐勞他鄉新塚在松柏晚蕭騷

潘太守挽詩 二首

昔在臨川郡行春皂蓋榮桑麻千里綠絃誦萬家聲意
澹終辭祿才高豈尚名至今城下水人比使君清

郡城華蓋下歲月忽如馳五袴歌猶在雙旌去不歸清
名史氏傳遺愛後人思有子從仁政傳家願不違

題竹贈廖子謨南歸

芳春宰花縣久別不勝思比似湘川上清風玉一枝五

年重晤聚幾月又分岐臨發無持贈聊歌衛武詩

贈建平弟

七十年兄弟于今二老存脩途余未息古道爾能惇後
輩紛紛出頽風靡靡奔晨星與霜木相對兩忘言

金幼孝挽詩

英年兼令質秋水映娟娟才行諸昆重詩書累代傳一
朝隨化物萬事逐浮烟聽話臨終意何人不愴然

送沈生歸省

舊與休文好曾聞小阮賢行衝薊門雨歸問浙江船璞
玉須成器韶光劇逝川承懽有餘暇努力事遺編

貽程夏二中書

扈從巡畿甸官曹喜接聯屢頒丹鳳詔須屬彩毫宣畫
障分雲樹琴聲瀉澗泉春行有佳興相伴共悠然

陪駕觀獵

武士擁周遭前驅導彩旌徑危兼水石野濶盛蓬蒿鷹
犬紛飛躍狐狸莫遁逃老臣方寸切上念聖躬勞

從度居庸高峰

玉輦巡邊徼師還此伐戩紫雲隨警蹕紅日動旌旄地
險關城壯天清眺望高非才叨侍從無補只徒勞

陳豫中八十壽詩

翛然無俗累恬澹樂丘園名譽三山重春秋八袞尊安
居非藥裏榮養自詞垣五月瞻南極華星正對門

送李主事赴常州通判

初出即官署先傳府倅賢天恩謝北闕春水載南船郡

已無三害民皆有一廬年豐公事簡淪茗試山泉

漳州曾氏望雲卷

縣城當桂嶺清晝白雲垂重到曾游處偏增罔極悲神
游杳靄外目斷蒼茫涯五色衣裳在承懽詎可期

寄李德言

高州李別駕未老倦纓簪金石論堅操冰霜炯素心閉
門吟對竹延月坐鳴琴半幅幽貞趣贈君文水潄

挽彭子信

昔者雩陽郡鬻宮重得師合宗推孝友後進仰威儀丘
壟松楸合春秋雨露滋諸郎惇永慕尤廢蓼莪詩

送梁叔車

有序

叔車謹行力學爲文章卓出流輩吾泊菴令子也
宣德二年會試不偶今歲復至則後期不及試其
歸也酌之酒而贈之詩云

離懷不可盡且復共芳筵卞玉終須獻韋經故有傳河
山行處好雲樹望中妍歸路詩千首因風寄百篇

送王希積泰和訓導

有序

抑菴學士陞少詹事其子積授泰和縣學訓導父
子同日受命賦詩贈之云

嚴親進官日並命出彤闈拜後多人羨光前似子稀
離情常北戀行色又南歸想侍慈顏處簪纓勝舞衣

贈梁叔莊泰和訓導

相違十載過相聚半年深論舊何曾盡傷離復在今
鬢宮雙白壁儒行萬黃金莫道匆匆別無窮遲好音

答黃宗載見寄

又是三年別新來百感增
薰猶安可問衲鑿苦難勝
白髮落垂盡青山歸未能
故人贈佳句擬報玉壺冰

贈仰善主事南歸

重逢方適願幾日又分岐
瑚璉真堪寶雲霄自有期
從知萬人見肯受一塵緇
無限歲寒意題詩贈別離

送蘇伴讀

德義儒林重詩書學海翻
校讐辭祕閣輔導向王門
曉

鐸行車遠春筵賜醴溫須明藩屏意天子萬年尊

送劉凝節歸永豐時有興國訓導之聘

都城一相見文采動華年家與先賢近經從太史傳三
春還舊邑百里望平川應復匆匆去諸生候講筵

題敏求齋

閒居積文史不厭五車多白玉須成器流光惜逝波塔
前春草遍林下午風和還有同門者時來共切磋

送王霖知縣赴閬鄉

千里河南北憂勤切至尊兵年兼旱潦民命急朝昏身
倚詩書貴功將撫字論無忘當宁意一一在覃恩

劉指揮勤學齋

時平無警柝公暇事遺編解劔聞春誦燒燈減夜眠竹
深幽院裏花暗素房前事業由多學相期及盛年

送王性存親迎後歸省

朝辭金闕去千里赴庭闈錦繡行春晝何須五色衣岸
花明畫障江月淨琴徽一路彈新調鴛鴦不獨飛

張生水竹居

傍水連高竹門前似渭川
雨晴看淨練風爽聽清弦
爲酒兼燒筍持竿屢取鮮
還資奉甘旨非但樂林泉

戴誠問挽詩

闕
携如昨日寤寐想平生
操比寒松勁心同秋水
清詩書安素業身世避浮榮
冢樹西風裏淒涼故舊情

王好信挽詩

來往經蕭峽舟人指富溪
林藏君子宅行慕古人齊
錦

誥恩封在青山壟樹迷郎曹未終養愁絕夜烏啼

焦主簿挽詩 二首

郿縣岐山側萍鄉楚水潯扶持有神力惠愛在人心往
事歲年遠高墳松柏深自天鸞誥出奕奕寵光臨
憫物由天性能官不假威重爲百里佐遽作九原歸瑟
瑟瑟風迥荒荒零露稀惟餘鳳毛在五彩翮雙飛

寄王宗豫 二首

相別歲頻改相思心未降故家滄海國高卧白雲窓適

趣琴三疊隨游鶴一雙東來抱錦軸喜見筆如杠

內閣承宣地朝朝侍柘袍七人亡過半二老去能高蹇
劣仍踰分驅馳豈任勞懷歸歸未得鬢雪不勝搔

胡敏御史致事出梅求題余於胡有舊故賦二

詩識別

祕館曾同事流年四十餘花封有嘉政柏府重清譽致
事新恩命懷鄉舊隱居湖塘三百畝已免貢菱租

五月出都畿東風暑雨微濟河新漲發淮浦片帆歸朋

舊驚霜鬢鄉閭重繡衣
歲寒怡老處梅雪共清輝

寄楊仲舉長史

誰不戀丘園兼之鬢雪繁
幾人知道義用世必璵璠
遂有賢王奏恭聞聖主恩
平生欽慕意喜極欲飛騫

題竹送陳中負外

文雅陳負外三年一度來
春風對玉樹浩蕩好懷開
北闕晴雲下南河彩鷁催
一枝淇澳贈臨別意徘徊

曹侍郎乃母挽詩

曹家少司寇至孝奉慈闈衣貯親縫綫堂縣舊斷機喜
崇二品養遽動九原歸天恩下鸞誥千歲有光輝

題竹送樂象乾并寄聲陳述

京國三年別驅馳越漢皋冰霜綱紀地旦暮簡書勞入
覲還相慰能官見所操臨分贈淇玉更爲謝同袍

題王郎中九峯歸趣圖

老別郎中署人看畫繡榮家臨三泖近門對九峯清隣
叟來分席家僮從閱耕君恩重山岳一飯未忘情

贈蕭斯易御史巡按蘇常諸郡

繡斧辭京國三吳候畫船
丹楓秋水岸白鴈早霜天
憫物須蠲蠹觀風在禮賢
功名仗才俊努力及英年

題陳憲山水

何卿妙寫趣陳憲問題詩
野水瀾溪澗春雲壓樹枝
羣山如對客獨學更求師
待我歸來日披圖共酒卮

送凌副使歸省先塋

先塋賜歸省臘盡出都門
鴈影行途遠梅花到日繁
春

風待旌旆畫錦入鄉園情事從容畢不忘當宁恩

題梅月軒

清軒夕不扃梅映月娉婷移影上琴薦浮香著硯屏一
塵元不染萬籟寂無聽即此坐閒暇澹然心志寧

次韻答胡若思賓客 二首

東壁蓬山頂曾同侍玉皇碧霄龍早逝滄海鶴高翔案
有莊生論門臨孺子坊遊心逸千載塵慮已都忘

自別頤菴叟星行十二周天恩無寸補世故有多憂老

驥力垂盡長途馳未休中懷何處寫聊用寄南州

重過鷄兒嶺傷用道長史

荒山千萬疊茅舍潁河濱豈意清明世翻爲憔悴人命
窮身不返志屈道還伸爲灑重來淚平生心所親

送王希德歸西昌

三歲在京畿春生五色衣殷勤承父教歸去候慈闈丹
桂浮香露黃花粲夕暉人生具慶少養志在無違

送用儀之官萊蕪

百里銅章貴英年寵命新
侵星辭闕下帶雨發河津
歲歎須寬恤民勞急拊循
前賢有塵甑垂譽已干春

送梁叔脩秀才歸西昌

灑落王詹事人今第一流
相看佳子壻冰柱照琳瑯

闕

留經歲家山到及秋文章千載事
珍重滿歸舟

御史陳穀乃父挽詩

行已嚴三畏傳家守一經
選才成大典膺召謁彤庭
草露俄乘化松塋已勒銘
平生知不泯有子嗣芳聲

楊孟潛挽詩

芳春奮科目，令器比璵璠。致孝親闈樂，傳經學者尊。一朝隨化物，羣行載詞垣。光華知不泯，况有鳳毛鶩。

送叔綱表姪

叔綱來北京聚處月餘告歸詩以勉之

失怙憐渠早，提携賴母慈。門庭已秩秩，兄弟亦怡怡。觀國欣初見，懷鄉又遠離。外家多子姪，期爾讀書詩。

送葉錫尹姑蘇

買得吳中棹，遙辭潞渚濱。重爲花縣宰，舊是玉堂人。霜

菊看將晚寒梅到及春從知錦繡地不肯厭清貧

題梅贈郭太守還鎮江

每憶春坊舊寥寥歎曉星明時用郭伋五馬駐江城庠
序絃歌盛桑麻雨露榮梅花一片月長伴使君清

暇日承觀上人惠訪

上人吾郡忠簡公之後於予先世
通家其行甚高故以詩奉答盛意

參禪周十刹隨地演三車水月心常靜烟霞趣已賒胡
楊皆故族孔李更通家一訪空齋裏玄譚過日斜

題畫贈梁壻叔濟

蕭散藩翰幕時平淨俗埃河流帶近郭樹色藹高齋簡牘常時閱詩篇暇日裁閒情對圖畫亦勝倒金罍

題任生山水

溪亭夏無暑不假碧荷蒲垂柳軒窗外青山眺望中水漾玻璃色香生菡萏風借問坐譚者還知無極翁

送王志浩

鳳歷紀王正新春別帝京行觀具區藪先過闔閭城聖

主方興教諸生喜受經他年看奏最崇秩有光榮

挽馮知府

淒斷南來訃相違始十旬晤言猶昨日死別惜芳春冰
檠聲仍在龔黃志未伸平生鄉郡意回首一沾巾

題竹送劉子欽

故人劉子政契濶十餘年此日重携手相看各白顛交
情方戀戀別袂遽翩翩聊贈歲寒意琅玕雪共妍

題福建吳布政竹石圖

家住鄞江上作藩閩海涯旬宣有餘暇公退足委蛇竹
秉歲寒操石含大古姿高齋坐相對無忘武公詩

送陳斌副使之陝西兼柬陳憲使于副使

驄馬向咸陽東風驛路長渭川清映月秦樹早迎霜風
采人心快貪漁吏弊亡陳于榮並命冰玉共高堂

寄吏部尚書黃宗載

白首記同年懷君靜勝仙冰霜老北地雲樹渺南天近
俗傷多薄無言忍獨賢離情何所似春柳遽飛綿

忠孝堂

江西都指揮僉事滁陽馮公鎮名其堂曰忠孝蓋
昭先德以儀後人也昔公之大父父皆奮武功於
國家肇創之初致位通顯矣大父母沒其父塋祭
以禮廬於墓者三年父後官邳州衛指揮使追捕
倭寇於海上力戰以沒此公之父忠孝焯著雖沒
世後之人不能忘而堂之所以名也吾聞僉都公
之喪其親也亦嘗廬墓今以才能益進其位且致

誠以事上詩曰孝子不匱永錫爾類吾於馮氏見
之矣賓客胡先生爲記忠孝堂公以求余詩爲賦

唐律云

桓桓忠孝行藉甚說馮君有子傳先德能官績武勲高
堂名教事巨筆史臣文四海皆臣子芳聲獨遠聞

題劉綱知縣梅花

作令更三邑茲行向海邦民風尚文學士俗亦惇龐須
得窮欄好還令蝨吏降梅花玉雪意常若對寒牕

題蕭氏林泉居

壯遊兩京路邂逅多寫真一隨化物盡屢見流年新承
家有令子志墓託名人寂寞水南畔依然舊松筠

送陳虬延安知府

天子急民瘼廷臣領郡章平生懷玉雪此去播春陽鵬
鷲雲霄迥驂騑道路長試看韓與范遺跡在邊方

次韻答願菴二首

十年去京國高卧西山陞天趣常自得他人安足知竹

館鳴琴處河塘坐釣時勞心塵事者何日赴幽期
與君離別後兩度歷邊陲年老衰容換風寒病骨知有
心存濟物何術可匡時矯首西江上歸帆會有期

送劉知縣赴莆田

遠邑需良宰賢科起茂才九天辭玉闕一騎發金臺濟
北初舒柳江南未過梅能官崇富教莫遣吏民猜

題劉氏奉親堂

雙親各垂白至樂奉安居養有日官祿教傳星象書椿

陰滿庭戶，諼草映階除。日月趣朝退，班衣侍婉愉。

送貢士任善歸豐城

妙齡兼令質，歸省自京師。爲學功須倍，升榮計未遲。歲時將暮矣，霜露亦淒其。珍重關河道，高堂切爾思。

題鄭氏思親卷

不忍杯棬飲，愁聞陟屺詩。九原那復作，寸草恨難遺。爲養誠無及，行身庶可期。靈椿百年壽，至樂罄吾私。

章江劉先生挽詩

經術師承正才名天分高閒情安野逸雅操邁時髦百
歲光陰遠諸生慨慕勞章江庭館外逝水日滔滔

送東平傅知州復任

政成初北覲考最復南征相逢遽相別繾綣若爲情露
冷黃花老天清錦樹明吏民迎望切慎莫滯雙旌

題竹送賀寧知縣之豐川

作宰豐川縣芳年際聖朝時清公事簡地僻瘴烟消撫
字須勤職驅馳莫憚遙匆匆斗酒別聊復永今朝

送錢習傳

迢遞滄江路天寒風雪深相知何在早臨別自難任人
重崑岡玉鄉榮郟氏林爲山終一簣持贈比南金

汪氏慈訓堂

早失過庭教深依母氏恩持身在仁義奉訓切朝昏天
地何由報行藏矢弗諼慈顏千歲壽春暖北堂萱

吳母挽詩

西風北堂上白日黯春暉寂寂承懽處塵封五色衣未

終三釜養遽動九原歸女範傳應在閨門嗣不違

劉母挽詩

祿養人皆羨兼榮母德賢空遺板輿在竟負綵衣鮮
弔鶴嗟何及乘鸞望不旋恩封異他日光命賁重泉

蕭母挽詩

日夕烏啼樹悲風起總帷彩衣空五色無復上堂時
壺範嗟猶在靈遊不可知百年懷養者長廢蓼莪詩

春暉堂

早失趨庭訓，深依徙舍恩。
踉蹌五色服，樂舞對春諼。
壽酒華觴進，安居綺席溫。
持身務不辱，還究古人言。

送樂舞生還閩中

清廟連丹闕，天壇接上台。
君王嚴祀禮，樂舞得仙才。
閩海三秋迥，雲霄一鶴回。
飄然終散逸，還憶上蓬萊。

題郭智憲使榮養堂

朝廷崇孝理，憲紀用儒臣。
分得烏臺祿，歸榮鶴髮親。
褒封承帝命，光彩煥龍文。
慈壽知方永，諛花百歲春。

挽吳彥直

珠還合浦日令尹擅廉明興學皆從化鋤姦赫有聲詩
書傳奕世夷險任平生婉婉臨終詠聞之共愴情

贈尚書呂公挽詩二首

清比藍田玉含輝故有餘鄉人尊德義世業重詩書渭
水淹吟興蓮峰對隱居百年皆過隙不泯羨芳譽

瑞世生賢傑登朝奉聖明身膺二品養官贈六卿榮光
寵真千載遭逢自一經龍章照玉璽褒拂極平生

示稚秣及昱

行年七十七况復困沉疴世德流傳遠天恩覆被多
冉西顏景駸駸東逝波詩書好承續黽勉勿蹉跎

時勉學士陞國子祭酒奉贈

三首

近侍踰三紀文章東掖垣冰霜存檜栢廊廟薦璵璠
帝重經筵舊官陞師道尊翩翩起車騎相送向橋門

拜命彤廷日龍墀瑞雪飛縉紳瞻有喜察案念相違
時雨司成館天香學士衣斯文千載運吾道有光輝

玉署東頭閣紅扉晝不開
衰齡餘我在清論更誰來
學者希傳道朝廷仗育才
賢關有佳興時寄錦箋回

挽拙菴徐子信

行義時人重才能邑里稱
系傳高士遠家挹太湖清
身世驚流電朋游歎曙星
從知郭有道不愧蔡邕銘

贈僉事魯希文

有序

天台魯希文自爲御史有廉明
出僉閩憲風采揚厲嗟乎安得
今之僉藩憲者皆希文哉其考績而

歸也賦此贈之

自是天台秀聲名起繡衣八閩監海國六月凜霜威考
績趨丹禁承恩拜瑣闥從來冰檠操吾道有光輝

示姪孫鏞

念爾遽遠別送行無限情一心常體道百行貴存誠海
濶鷗鵬運天寒冰雪清盛年當努力莫讓古人能

題竹贈陳文編脩

廬陵南望遠六十五長亭之子歸寧日重闈拜慶榮文

章金榜貴官秩玉堂清一幅湘皋贈殷勤故郡情

題竹送李紹檢討

安成李克述三歲在詞林言色溫如玉操持堅斷金君
恩紫誥重親舍白雲深萬里歸榮日聊貽淇澳吟

寄顧都御史

翩然謝榮祿林下樂天真臺府留清望朝廷憶老臣神
情超物表光彩動星辰俗轍何由到長同園綺親

雨後

炎天久不雨數雨復還晴竹樹繁陰合階墀幽草生閉
門無俗事散帙任閒情回首時西睡芙蓉千疊清

庭樹

手種庭前樹參差總出牆不須愁夏暑已屢傲寒霜過
雨紛交翠因風亦度香如添清澗遠即擬住山莊

暑中卧疴寫懷 二首

坐卧連晨夕中懷鬱不開蠅攢眉上棘蚊隱耳邊雷無
那悵焚困生增襜襪來病咽兼患齒兩月廢啣杯

白髮垂垂老丹心耿耿存毫絲無小補天地有深恩病
馬長聯阜羸牛不駕轅蓬山望咫尺慚負不勝論

示表姪陳純

西江海桑老冠冕重儒林我自外家學爾求曾祖心詩
書宜善繼塵俗莫容侵不見南山樹寸莖今百尋

送魏源尚書按視邊務

寶劔動華星關城候使旌春隨司寇筆霜重總兵營武
備千年固塵氛萬里清歸來奏天子青史載鴻名

題梅寄傅知州

初入聊城縣遙聞鄆守賢
教先重芹泮治不假蒲鞭吏
牘清無滯農田盛有年
公餘多秀句吟咏玉梅邊

過濟寧作

久發潞河棹初經濟水潄
遠山明曉黛新柳動春禽
戀闕雲霄迥懷鄉歲月深
君親總恩重來往並關心

舟中夜待弼姪不至

維舟喜相見解纜復相違
江濶春潮滿雲深夕月稀
無

眠成脉脉延佇但依依寂寞蓬牕下挑燈坐攬衣

入西江境

萬里移歸舸東風謝絳桃烟迷彭澤柳雪噴海門濤身
世江湖老君親夢寐勞匡廬翠九疊蕭散白雲高

歸來

歸來語向誰白髮故交稀滿目亭臺好傷心俗化微慌
迷携鶴徑慚過釣魚磯童子何知我猶啣舊素衣

夢諸孫

繞膝戲諸孫相者意獨親
憐渠森似玉對我浩生春
已惜承歡淺何堪入夢頻
允宗吾望汝莫遣愧荀陳

寄黃汝申憲使 二首

藩垣出嶺表憲節赴山東
舊有先師化行惟大道
公百僚歸表率一志在瘵痾
綱紀從容振時來視類宮

預想山東境高才起頌聲
黔黎誇用恕察案荷推誠
老栢霜逾勁寒梅雪共明
應同鍾憲副一力振澄清

五月六日早靜海迤北大雨聊可蘇旱

仰視月離畢滂沱不待晨人心異昨日物態總回春尚
憶郊原遍深思天地仁來牟已無及回首一霑巾

直沽

城堞繞魏峩城陰下九河水歸東海近人上北京多倉
廩皆漕儲閭閻半負戈魚鹽十萬戶何處有絃歌

過灤縣望都門西山

東旭光芒起西山紫翠分馳心向鳳闕仰首見龍文旒
影高低出鐘聲遠近聞預將纓紱振擬近玉爐薰

贈文玉主事

清高玉堂署聚處歲年深心事澹於水交情利斷金衰
齡各垂白遠道又分襟重會知何日臨岐慘不禁

送宋萬中致事南歸

白首遂辭榮承恩出鳳城故交推我老遠道念君行酒
對黃花酌颿隨白鴈征臨岐記同學惆悵不勝情

戴母挽詩

道路何屯塞閨門著肅雍行宜君子配恩拜孺人封粧

閣間薰鴨床幃慘暗蛩薇垣朝退食舉案屬誰從

重寄澹菴

東觀承恩地俱看鬢雪侵別來春未暮延佇夏將深憶
我辭家日知公戀闕心五倫書未奏還待共披尋

慰時勉學士喪孫

有序

向知令孫之疾醫藥頗效今日遽聞不救爲之驚
悼祖孫之情蓋可想見僕有第五孫敦龐且慧前
歲到家侍邊甚樂已三歲矣去冬失之得書悲念

累月迨今不忘況在令孫年幾及冠情益何堪惟
高年曠度宜以理遣况今斯文之任屬望於公非
淺淺者老病盛暑加之公務不得躬吊輒賦四十
字致寬慰之意云

承過西昌日提携已識竒相隨萬里至翻動九原悲豈
是多特別無深歲晏思與君俱此痛排悶強裁詩

寒夕獨坐鄉思浩然有懷何文淵

二首

鄉國雲山外衰年入夢勤經旬斷杯酌獨夜對爐薰竊

祿真慚我論心每憶君許丞渾重聽時事不能聞
薄雪俄消瓦驚風復撼窓蹉跎忽晏歲寂寞伴寒缸病
骨支難穩愁心鬱未降何由冰泮日聯棹泝西江

送袁本謙致仕歸二首

早歲從王事迢迢促去驂十年留漢口萬里入滇南舟
楫行應慣弓刀力不堪昨朝新有旨頭白許抽簪
白下門前路殷勤獨送行楚山浮暮靄淮樹起寒聲菰
米香雲飯鱸魚紫玉羹老年今有此何異學長生

寄何文淵

忽復經年別思鄉趣不稀
松筠還舊隱山水溢清輝
把釣銀鮮滑携鏡紫蕨肥
南歸吾有日訪剡興無違

送廖子謨貳守歸河間

三載一相見匆匆又別離
荒年兼旱潦聖主寄嫗嫗
劉毅才無敵陽城道可師
勲庸屬賢俊努力及明時

挽詩

鄉里談遺德傳流終未休
甘依泉石老不應棟梁求
風

樹貽深感雲山徙故丘憲臺忠孝在寵贈被恩稠

送周仲規脩撰

思拜龍頭選六年登禁闈暫辭金殿直遙著錦衣歸雲
淨江天濶潮平島樹微舟行足清景詩思未應稀

送劉定之編脩

六載庭闈隔常懸定省情自天膺寵命即日戒歸程人
物金閨彥才華玉署清承懽在有道非但錦衣榮

任善得教諭于蜀辭行詩以勗之

典教除巴縣之官出帝畿也知輕道路所樂近庭闈河
岸楊花滿帆檣燕子飛相期傳授暇自省莫令稀

送別

相送復相別花飛過却春朝廷屢考最黎庶總歸仁但
倚丹心在從教白髮新崇文門外柳折贈不辭頻

題晉江何氏怡壽堂

聖代多耆壽何家有鳳毛諛明承日暖椿老拂雲高甘
旨供天祿歡娛艷賜袍庭闈介百歲錦誥見華褒

送曹都御史

寵命膺邊寄天書煥紫泥
九秋辭闕下萬里度關西
著笏金橫帶乘驄玉作蹄
歸朝奏成績光寵賜鞶犀

陳母挽詩

曾題南野墓主孟復云亡八袞又三歲
諸孫泣滿堂母儀鄉里重婦道族姻傷
忍聽門前樹烏啼慘夜霜

寄蕭德迪

桃源蕭德迪苦志事題詩含詠常忘暮
抽思無倦時雲

邊寫素瀑巖下發華芝萬里勞相寄聊酬青鳳枝

題竹贈彭同知

分得篔簹谷脩脩翠一竿曾聞裁作簡不假製為冠
勢接丹青近清宜白日看但保風霜操相期歷歲寒

題梅贈醫士蕭玄立

蘭陵傳譜系兩鬢雪霜侵醫業過三世仙方抵百金
橘香蘇氏井杏艷董家林更着梅花好光輝利濟心

毛行人奉使江南便道省親題梅花贈之

去鄉六千里念別思悠悠共是江南客君乘使者舟折
梅將遠意擢桂重名流捧檄升堂日承懽慰白頭

哭康甥孟嘉

提携二十載羽翮已雲飛眼見乘驄出驚聞旅襯歸素
行元不忝夙願竟都違雖不多時別能無涕淚揮

林僉憲斗山風木卷

青春豔繡衣得祿更興悲無復娛親日徒傷負米時迢
迢桑梓戀惻惻蓼莪思天地無窮極難伸寸草私

重游東郭草亭

園亭風日好邀客綺筵開重合金閨彥兼聯玉署才泉
流經近席花氣拂深盃不斷勸酬意更堪絃管催

題梅贈蕭雅容員外赴兗州知府

有美同鄉彥茲晨又別離光承寵命出正及艷陽時撫
字人皆望操存我所知梅花故園意持贈慰相思

題竹送雅容老友復任湖廣布政聊寓折柳之

意云

榮捧天恩出都門雨散絲重臨江漢上深慰吏民思純
璞時稀識貞松歲久知相逢即相別聊贈鳳凰枝

送劉習之有序

老友劉嘉會先生九十而終數年矣念之不忘前
歲見進士同今歲見檢校習之喜先生之有後也
習之赴湖廣故作詩送之并致訊雅容云

故人不可見喜見子孫賢昨者義烏令今來黃鶴仙芳
春都市酒新水北河船却憶蕭方伯分携又五年

挽翰林檢討廖敬先 二首

久重青雲器，皆傳白雪歌。
較文來棘院，承詔上鑿坡家。
倚詩書富人沾惠化，多荒涼孤館下無處聽鳴珂。

左掖門前路朝回，不共行竟違金殿。
直虛夢玉樓成鄉里，思陳寔君王失長卿。
同官悲永訣，掩泣送銘旌。

送方御史往浙江詩 有序

懋德初爲翰林庶吉士，太常博士數得相見爲御史。
職務繁終歲，不再見。昨奉命往浙西來告別。

古語云御史須用第一等人趙清獻公抃爲殿中侍御史常云君子不幸有小過註誤當扶持愛惜以成其德小人有過當力排之後乃無患蓋有合於大易扶陽抑陰之義程明道先生爲御史裏行神宗問其所以爲御史者對曰使臣拾遺補闕裨贊朝廷則可若使掇拾羣臣短長以激直名則不能神宗歎賞以爲得御史體此皆古名賢行實也高山仰止景行行止敬書以爲懋德之贈

翩翩驄馬出遙赴浙河濱
冰雪衝寒景從知到及春
清心持憲節隨事體皇仁
履道由中正相期繼古人

挽韓本常

有序二首

越之山陰有隱君子韓本常氏
宋魏國忠獻王之十二世孫
明經持行累聘不起見重於士林
其配劉吾友淮府長史真之女
兄也賢而篤孝其沒也合塋矣
其子陽今爲監察御史廉重剛正
克振風紀信其本之於家者厚矣
陽痛祿不逮養求作挽

詩故爲之賦以解其風木之悲云

勲德崇先代山林樂隱居
閉門逃寵祿充棟有詩書
流水心同淨浮雲意共舒
儵然隨物化千里見名駒

賢淑諧家室升堂孝德齊
一丘掩雙壁愁絕夜烏啼
白日玄臺暗青山綠樹迷
顯揚終有待光映史臣題

挽禾溪樂仲韞

稀年德更稀至孝奉慈闈
子長皆知學倉虛屢賑饑
閒情松菊徑清代芰荷衣
人往家現在流傳世有輝

送孫教授鼎還淞

吳淞孫郡博如玉淨無瑕學者皆心服
儒林譽孔嘉塞垣來白鴈河岸綻黃
花又屬匆匆別題詩贈去槎

五言長律

胡泉州朴齋

籍甚清源守高齋近海濱依然如白
屋惟是表朱輪松竹論深契詩書對
古人吏民從尚質風俗漸還淳治比
劉宗正謫傳召信臣良哉二千石時
獨見天真

洪處士挽詩

累葉詩書後三山組綬門獨看辭寵祿清隱樂立樊
賓席高年重州閭善行惇雲中桂子出天上鳳毛騫
晚有南宮養時傾北海尊將迎榮命下先睹少微昏
蕙帳驚秋鶴蘿扉慘暮猿生芻遠莫致哀些託空言

孝思堂爲南安守作

父已卒母在鄉

故里高堂遠青山宰樹蕃飛騰榮帝命感激重親恩
宣化安諸邑行春耀兩幡撫時悲逸轍臨水嘆深源
定省

晨昏急聲容夢寐存顯揚須力致表率在身敦郡賴爲
仁治天將錫類繁聖朝崇孝理終見表清門

送萬資中赴南京大理寺副

萬生吾郡秀文學重鄉評不媚難諧俗無爭亦讓能盛
時趨召命累歲在承明書奏天顏悅恩沾寵賜榮聯班
謝北闕兩騎赴南京齊魯經游好河山眺望清徘徊慨
往迹傾寫暢吟情議獄須推恕持廉豈爲名孜孜體帝
德勉勉驚王程公退如清暇潛心向六經

纂脩以下陞
官皆得北京

惟節與陳中皆得
南京故云兩騎

題元端本堂所臨宋徽宗蘆鴈圖

慘淡窮陰日蕭條積雪時風含烟際
茨水汨水中坻鳴應翻飛疾栖兼飲啄
宜臨摹盡物理點染妙天機無逸當年
畫幽圖七月詩望崇端本地志異古人
爲絕藝功何補爲邦事可希不存前轍
鑒徒激後人悲

竹軒爲徐以道賦

幽人樂種竹竹生繁且妍垂雲幕
戶外映月搖堦前晴

疑抗翠翮風類鳴清絃夏來暑威薄冬至寒節堅時携
羊求侶亦詠嵇阮篇即此適蕭散焉知塵俗牽

題竹爲族孫挺

有跋語

少年祇北覲初命戒南馳虎踞石城壯龍蟠鍾阜竒國
崇根本地政肅紀綱司佐幕先修己趨臺自履卑小心
勤職務一意謹操持有過須知改凡痾莫已醫赴公恒
起早退食每歸遲損友非吾類前賢盡我師謙虛終受
益教情恐招危寡欲堪常樂多營枉自疲勿貽君子賤

何畏小人嗤餘力披書卷平時遠酒卮天桃朝暮色貞
檜雪霜姿永矢平生志母因薄俗移每虞端有道萬邑
潔無私左右親規誨興居視表儀顧余今潦倒念爾遠
睽離行矣圖樹立庶當光遠期

族孫挺得南京都察院檢校辭別以此竹乞題吾
於挺固自有意豈在於竹韻語百八十字雖率爾
皆切要如不視爲虛言即於吾宗有光矣挺往勉
之

送彛訓致事 有序

吾友湖廣參議陳君彛訓以疾得致其事歸過余
別出視少傅建安楊公所贈五言長詩曰同郡之
好乃無一言乎余念彛訓初擢近侍在西掖者十
八年可爲滯矣及陞贊方伯之湖廣者再之廣東
者一往還道江湖關山之險不啻數萬里又何勞
也於今行者赴家勞者就息人生至願爲之喜者
可無言乎又念彛訓初入西掖吾郡之同者三人

後皆陞用於東廣今獨彞訓在而彞訓持已愛民
尤戴清議可無言乎然余之生及仕皆先彞訓二
歲而疾甚焉乃不能引退以適夫止足之義獨不
內愧乎哉故雖言之而厚顏多矣

祖帳餞河橋臨分贈柳條鳳池年歲久薇省道途遙宦
達垂三紀恩深荷四朝丹心常耿耿白髮遽蕭蕭辭祿
身無繫懸車興自超人猶羨簪紱我已向漁樵竹色涵
書几花香著酒瓢遠歸真足樂高蹈竟難招羈旅憐同

郡分携重久要白駒如可繫聊復永今朝

宣府行營夢侍先師海桑先生

純明程伯子灑落邵堯夫世仰文章伯人尊道德儒
山川鍾淑氣星斗煥高衢逸趣龍游海光儀鳳在梧卧雲
辭國聘立雪盛門徒義合隆先祖恩沾自早孤摳趨隻
影在報施一塵無夢覺追疇昔衾衣涕淚濡

壽吳氏母七十 文正公家

盛德詩書後慈闈節行全冰霜寒自潔松柏晚逾堅孝

有宗家說賢因女教傳春秋高八袞鸞鷲眩雙騫記日
維華旦瞻星麗碧天瑤池來阿母珠翟儼羣仙瓜棗千
年熟蟠桃五色鮮長生紫霞曲歌舞樂瓊筵

贈余通府

聖代崇仁治臨民簡俊英存心堅鐵石持行炯瑤瓊吏
蝨春水淨公堂秋水清干求皆遠跡游惰亦趨耕光復
山川色兼涵草木榮還因掃蝨騰庶用育孤嫜下邑今
多幸南州舊有聲三年此相見深慰別離情

聯句

同尤文度曹巽成院中夜飲

良朋枉惠顧清霄集詞館久別念契濶

楊

嘉晤諧燕衍

維時屬秋霽

尤

展席面河漢輝輝月轉階

曹

稍稍風侵

幔菲薄陳豆登

楊

綢繆綴篇翰才思繭絲抽

尤

詞彩珠

璣粲語深香屢續

曹

興洽爵無算撫今誠可怡

楊

感昔


亦奚嘆露白氣逾肅

尤

參高夜將半且共盡茲夕坐待

雞鳴旦

楊



東里續集卷五十八